

1.	Zzibbaer Goxr	3
2.	Yix Seixl	5
3.	Veixr Zzo Zeixl	6
4.	Veixr Seixl	7
5.	Larmirta Bei	9
6.	Ca Si A, Arsae Bei	11
7.	Jiax Goxr	14
8.	Yixrggiessor	20
9.	Ggie Baxl	26
10.	Miar Bei	31
11.	Sul Zza	33
12.	Vixlux Naexr	37
13.	Loxrlapor Ddei Pia	38
14.	Ggo Zex, Pexniaxl Mex, Xixrzi Bbaex Nei Aelfuxr Gga, Mexlur Mex	53
15.	Loxrlapor Ddei Anix Nei Caleixlssor Mel Leil Biar	56
16.	Caleixlssor	59
17.	Cir Koxl Ceinir Xiu Leil Biar	60
18.	Capor Ssormaer Azo Lerler Miar Bei	64

19.	Xi Zi A Arsae Zi Biar	68
20.	Neir Zi Neir Ho.....	70
21.	Halcar, Cirmu Fu.....	79



1. Zzibbaer Goxr

Ngua mermi zzibbaer goxr a mel, so, sexbex, ggor, eilmel goxr, halae visaer, ceisaer mel lei goxr cexr. Nael eilleix mel ceisaer, visaer mel goxr su hormo sael nr zza a. So nei sexbex mel lar goxr miur a.

Zzibbaer goxr a mel, xilmeir mexrnixl ddei gga nr ni sael vul zaxr nia. Vul ho a nael, yoxl cirza-hanga baxl dax labox mel baxl dax, nei zzir ji a dder goxr ddo a. Zzibbaer goxr car mel, ni zabbar i dae nia. Zzibbaer ddei hormo duxl sael zza liaxr dae nia. Yel zzibbaer ddei hormo duxl zza ddei dax zox dae a, adoxl ggu nia. Zzibbaer eine cir boxl goxr a mel, zzibbaer so yoxr goxr teixl lei ddo. Ddux lei beil ar yoxr, aeljiur ar yoxr, maelele ar yoxr. Nael zzibbaer goxr teixl lei beil lal mel, yaa vur a lei perniarniarmo

vur. Aeljiur mel nael, bir goxr teixl lei beil mel leil perla. Maelele nael dder perla zzir mel nga a.

Eilcar si goxr vur a nael, eine nga arnar, halcar armael ddei armael goxr dda lalnga a mel, goxr teixl lei beil mel mel, si leil da nr vixr, armael olbbexr ar taex gga ji dae a, middur gga giexl kerzi du lei. Aeljiur nei maelele mel larnei si leil da vixr. Nael eilcar mel zzibbaer lei goxr miur si. Halcar sael hane nr bei a; goxr teixl lei maelmaerjjia lei si leil vur gger lalnga a.

Nael, loxlmoxr zzibbaer eine ar zzu gga a mel, ggor goxr teixl lei zzibbaer mel perniar zzir a. Dda lei yarzi ddaci. Zzibbaer goxr bexl mel, veixr leil lei zol ddo, halae veixr mel lei hazzi vaer he.

Yel, eilleix zzibbaer goxr su mel, veixr lei hormo zeil dax dae. Yel yarzi goxr huaxrzoxr.



2. Yix Seixl

Ngo yix seixl a, arsae seixl nia arleixr biar seir. Yix seixl a mel, xilmeir nael ssu gex du lei. Yel yix qihher ddei leil zox gex dae, halae oldde ddei leil nei ddoleixr ddei leil zox gex dae a, leibbei ddei leil ar pi seixl gger. Seixl ho a nael, baxlaxr ar peixl sser a ddor dae a, sirnilni maelmaerjjia ddux jjia lol. Yix ddei sirnilni ddux car, yar leil zox nr gex dae arddeirnga mel, yar dder pirteir-portor bbiu du si var.

Seixl zil gger ho a nael, yix ddei he yaxrpeyr gga ji dae a, vizubbaex dox ji a arleixr taxl. Eine saelnei me mel zix teixl lei ddo. Zix teixl ho a nael, xilbe ddei kier kae a, xilbe zzar hal zzu giexl teixl lei. Yel hoba yix zi ddei vei pixl nia, nrnga a bbeixr zil a, hor mel leil ddeix arddeirnga a mel, kar wo nr ddo. Zi ddei vei pixl ho a saelnei vu pox. Yoxl xilmo ddei kier kae a, yix zzo zzu piar pixl a, cor ardoxr vei a, vu nei xilmo mel seibeixbeix a arleixr cir. Eil zzu bei har ho a nael, yix ddei taexl kae a, tox ddo a. Tox ho a nael, zeixl lel lei ddo, lu lel lei ddo. Hherdder eine nga a.



3. Veixr Zzo Zeixl

Veixr zzo zeixl a, arsaе zeixl ngo nia leil arleixr biar gger seir. Sir Heixl xiu gga mel silbbar nibaex zza, yel silbbar nibaex mel nolnoxr a tox a, veixr leil zeixl zol. Ceidil Zalxiu gga nael, silbar nibaex nr zza a, yel nrbbа var peixl ardoxrdoxr zeixl zol dax. Nrnga a nael dder paer hie zeixl zol miur.

Cirmelmel a nael veixr zzo ddei dox ji ho a dder naxgax ddei ggiex ji dax. Cirmelmel a nael zeixl mi ddo jiur a saelnei tur gga ajjix cixl ardoxr ji a, tur ddei gga naxgax ddei ggiex har ho a saelnei veixr zzo acae gga dox ji. Eine nr ggiex arddeirnga a mel, argaxl naxgax ddei cir taex cir taex kae gex dae var. Sir Heixl xiu gga veixr zzo zeixl a mel, zeixl mi gaxzi nia. Nrnga a mel, veixr leil doxl leilei. Nael arcixl zeixl ho a, zeixl mi ho a nael, tur gga kexl cixl dae lol, yel argaxl veixr leil dox zol a dder ddo a.



4. Veixr Seixl

Veixr seixl lel car mel, yaa dax goxr naer dae ca, cirssor, gaxggor carbeix mel lei zzi leil beijjiu; ake ca hhexr cirddei-hanga lei bei dax nia. Veixr seixl du hal cir ni mel, kax gga yaa dax goxr naer dae caleixlssor cirmelmel a nael, zzocir zzor ji a dder beijjiu lei nia. Yel yaa veixr ddei leil ssu gex dae a, meir ddei leil neixl gex du lei. Eine bei ho a nael, veixr ddei leil zaezir ddei leil bbaelerler nixl gex dae, qihher leixrhher leil ssu gex dae. Yel ca ar ddei a mel altor ar baxr sser a, veixr leigursaer ddei dax halmaex zzir dil gger. Yel sirnilni mel nael pexrzi ar ddei sser a, ddor dae a argaxl zzor.

Eine bei ho a nael, acae gga ajjix ddei le taxl a dder veixr ddei leil ti gel a taxl ddo a. Eine bei a mel, veixr me mel gua teixl so. Arcixl gua ho a nael, veixr ddei leil yoxl zaezir ddei leil ti deix xixl.

Veixr ddei leil seixl zil ho a, me gua teixl ho a mel, oldde taex taexl teixl gger, hor mel caer teixl lei, xilbe zzar hher ji dae mel

vei teixl lei, hherggargex leil hor mel caer zei lei, yel hor mel vaervaer yeye eine caer mal; circo-circo lei zza, cirzze-cirzze lei zza.

Hor mel leil cor aex gex; yel warga ar taex gga sir heixl ni sael aex. Vei teixl lei a nael dder lebbor bbeixsael zzomeilelxi gga lei gaxl hie dae ddo. Yel gaxl hie gaxzi ho a saelnei bbezzir gga ji. Eine nga a mel dder xiaxr nr var a. Eine bei har dae a mel dder cir koxl ceinir xiu lei arddolcar zzor niazzir, arddolcar zzor cexr a. Veixr ddei vaer a zzor jjia nr xie, bbeixsael veixr seixl miur a zzor jjia nr xie, eine nga a mel nolxixr lei dol xixl ci ddo.

Hherggar mel lei dder cir co ssor cir co ssor eine taexl teixl lei a, gaxl hie dae a zeixl lel. Nael zoxl a nael arseir lei koxl eilbbaer gga dder zeixl lel. Nrnga a, hherggar mel mel lax so, yel zzor-nr-ci a.

Eilboxl nael xilbe zzar zzu leil biar du a: vumo mel nael, ngua dax su mel arseir lei cae zax lalnga; vussor mel nael, cirhhexrhhexr a nael vu zuxr, nael zoxlzoxl a nael arseir lei zeixl lel miur lalnga. Zeixl lel a nael, zabbar arleixr zaxr cir a, cor ji a dder zzor cexr a. Vu zuxr arddeirnga a nael, hor, noxbeinox, sirnilni, eil zzu gga cirza-hanga cor, zzexr, lalzir, eilmel baxl ji dax a zuxr. Yel cirque-cirque neixl du lei a lexl hie ho a nael, zzor lei zzor cexr, vei du a lei vei du cexr a. Nael xilbe zzar ddei kebal hor mel mel seixl hal cir ni dder zzor jjia eine miur.



5. Larmirta Bei

Larmirta bei xilmeir nael ssuzzae zzae nia. Ssuzzae ddei zzae ho a nael yoxl lexl hie nia. Lexl hie ho a nael, yoxl ssuzzae me gga mal. Yel larmirta bei cir ni nael, almeixrxiaxr goxr. Yel ssuzzae ddei almeixrxiaxr ddei gga dir ji. Dir ji ho a, almeixrxiaxr ddei kexlzzi lol. Yel almeixrxiaxr ddei zziseixseixmo kexl mal ho a nael yoxl yarbo ddei sil teixl. Sil teixl ho a nael dder vizu hal ddei woxr. Yel pursaer arsae leilei ar taex mex du lei a nael dder kexl teixl ddo a.

Cirmelmel a nael yoxl omo ddei gga some nal ji; nael hoba some ddei acae gga arleixr lu nia.

Cirmelmel a nael yoxl nolsaer nal ji; nael nolsaer ddei lei hoba acae gga lu mi ho a sael nal ji ddo. Ni larmirta ddei gex lol niazzir arddeirnga a nael dder nolsaer ggiex ji dax.

Cirmelmel a nael hiexrttox zza a nael, hiexrttox paex teixl lei a ggiex ji dax.

Cirmelmel a yoxl almeixr po ggiex ji dax. Ggiex ji ho a mel dder nialngasael kexl teixl lei a cixl dae lol.

Eine dder larmirta ddei bei teixl a.



6. Ca Si A, Arsae Bei

Ngo ngua mermi ca si a, arsae bei arleixr biar seir. Ca ddei si ho a nael, zzicarzzi dax naer dae ca mel leil ae si lei a, ca sima ddei leil pia veixr gger. Nael yar ddei zae zzir tox veixr gger, qixnex yarsixl ddexr gger, meir ddei gga piuseixl ji gger. Piuseixl ddei leil mel mae ar ddei ba gex dae. Yel maebbiur ar zex neixl gex dae.

Yel ca sima ddei sixpir ddei gga ji. Maebbiur zex oldde ddei dax zzalzzar arla sixpir oldde ddei dax eilbbaer diux ze lei lol a, halcar ddei zzirbae ar pir neixl gex.

Ca sima ddei leil ji xilmeir nael, sixpir ddei gga mirho nr zul sael kar ji. Teixsibbor nr zul sael jiu deix gger a dder ggabil dae ddo a. Yel sixpir ddei tavuxi agala gga dol dae. Nilhar bex so bex bex si lei a, hexzzi doxl deix. Ssormine hormoler zza nael, almeixr hormo bax zza. Cirbax-hanga leil yixfu ar taex deix dae nia. Eil zzu maelmaerjjia lei sixpir oldde ddei dax dol dae nia.

Yel ake ar xixl dol. Ssormine zzu yar leil olddetexl dae, capor ar piar ssormaer ar piar texl dae nia.

Giedae cir nehe merteir a nael, ca soler qie a, maddur giexl ssi. Zzocir zzorbbexr a nael, kax gga ca mel nael, almeixr vei dae a, taxrvixr nei hexzzi vei dae a beijjiu lei.

Circir-ssorssor zzu jjixr lei jjia a nael, ssormine mel leil xiux'oltex ddexr gger a nael, ca sima bil su mel leil olddetexl. Xiux'oltex ddexr su mel leil ggucirmi gga teixl lei. Gga teixl lei ho a nael, sixpir ddei bbax teixl lei. Giedae xiux'oltex ddexr su mel olddetexl dae a nael, cir ddei leil nolhherggar ar caex gger, hhexzzi ar caex gger. Yel leixrhher ddei gga vei dae.

Yel eilboxl nael, ma neixl. Baezo sser a, lorleix ddei sixpir ddei leil neixl gex. Neixl gex ho a nael, baxlaxr gga almeixr ar bax ji. Cir piar gga ardoxr xiu dol, xiu nr jjia ddei nael, baxlaxr ddei sixpir ddei leil zax ngexl. yel, baxlaxr peixl zax bbeixr lol nia. Yel dder bil teixl ddo a.

Xiux'oltex ddexr su mel nael, cir ddei a ggexrnextaex ar zze ddexr nia. Ca si su hhexr ca mel nael, caxiu beller ar taex bber nia. Beller taex gga nael, hexzzi doxl deix dae nilhar bex so taex bber ji dae. Yel yarjiul yar leil gga dae a, xilmeir ssi dae. Halae acixl ar ddei gga dae nia. Acixl ddei oldde ddei giedae piar gga za xixl lei lol nr ddo. Xilmeirbbaer halae sozir piar su ar ddei zza.

Yel jjiucaxl gga ssi ci a nael, xiux'oltex ddexr su mel nael, olddetexl dae. Yel ma za za ho a nael yoxl ssi dae.

Yel giexlhex ggie ssi ci a nael, lorleix ddei vei teixl lei a nael, baezo ddei leil die gex dae a, middur ddei gga ji. Yel xiux'oltex ddexr su ssormine mel nael, nolgger ddei maddur ddei leil mal dae a, nilhar so zix qix ji. Yel kebal ca mel nael dder sixpir ddei leil gua mix ddo a. Xiux'oltex ddexr su mel nei yaa leil gga su mel nael dder jjixr zaxr lei ddo a. Jjixr lei xilmeir leil nael ggexrnextaex ddei lixrbbaex ddei dax sixzwei ar cu leil gaxl gex dae. Yel jjiumo car gga adoxl ar bbeixr zi. Giedae yaa adoxl bbeixr ddei leil lal gel lei nia. Yel ake jjixr ci a nael, vaelnia nei saerhher peixl zeixl teixl lei, vizu ddei qiaxrmeix cir. Yel ca sima giexlhex su zzu jjixr lei a nael, caxiu ggaxr. Caxiu ggaxr teixl ho a saelnei almeixr zzor. Zzor ji ho a nael, seivi zzu jjixr a.

So ni loxr ho a nael, ca qie si lei a, legelbbe bil a lixrbbaex qiaxrmeix bei. Nael eine dder bei teixl a.



7. Jiax Goxr

Jiax goxr a mel leiddur eine soler zza: zoxlzoxl a mel yaa ddei cirssor mel yaa dax jjixr lei, halae horhor-zzizzi zzor, yoxl cirza-hanga gaxggor, caxlgo caxl, huade tiuxl, eine bei.

Arddolyox jiax goxr a mel arddolyox zzor labox zza, nael zoxlzoxl a mel halcar tortor dder zzor dae zzor labox mel zzor lalnga. Loxrlapor mel peilpei halmel leil zzor, nael zzo bei a mel zoxlzoxl a lei ake hher dae camar mel bei; leixlsu mel nael kebal miar bei ssi. Eine bbeixarnar nael, leixlgger-leixlla mel lei zzo bei ddo; arbbor ama lei bei ddo.

Var mel cirdaedae a nael melme ddaex, cirdaedae a nael cirtaex-cirtaex ddaex, yel azzu niux seir. Nael zzorci-ddami eine ar bbi a mel, almeixr nei cirza-hanga var lei zza. Bir dae a bbeix, varpiupiu, nox, yaxryol, olper, sexbex, ciryoxr-hanga varnibaex, halae veixr hor nei yix hor, cirza-hanga vizu lei zza, so mel nael aba ngexl lel, aba bul lel.

Loxrlapor mel halae halcar ddei ggo mel zex, qixrcaxrwul tiuxl eine bei. Nael eilleix mel arsae tiuxl naizzir arsae tiuxl cexr. Nael yaa mel halleix tortor ddei pexniaxl mel leil nolnger. Pexniaxl mel mel perler ar taex leil mo ngor caex ssor cex gex dae. Eil ngor caex mel zzi dax me le-nr-sel ngor yoxr me var.

Yoxl kebal ar yoxr zza, xixrzi bbeix. Eil ddei mel xixrzi li zex bei teixl lei arddeir a. Yel noni zaezae arla eine bbaex cexr.

Halae aelfuxr lei zza. Eil ddei mel Silpor halleix tortor dder sser dae arddeir a. Halae mexlur ar yoxr zza. Suddu sir su zza, yel mex labox ar su, tor labox qiuxl su, nael mex labox nal piar nael ddaexrcir du lei nia.

Loxrlapor ddei jiax mel gga zoxlyoxl zzir jiax ddei mel hherdder Guxlsixl goxr jiax ddei nga a. Nael Guxlsixl goxr xilmeir leil mel veixrbolmar seixl lel nia. Veixr seixl lel car mel yaa dax goxr naer dae su ca nei gaxggor carbeix mel lei zzicarzzi leil beijjiu. Ake ca hhexr cirddei-hanga lei beijjiu.

Guxlsixl goxr hal nr ni sael mel, ssormaer mel mel hhexrnaexr eine bei; capor mel nael, zzo bei, var bei, halae yoxl dirsir igax su lei zza. Nael yoxljiur zzir ddei mel dder gaxggor carbeix leil qie si lei a, almeixr zzor lei lol.

Guxlsixl xiugge cir ni nael, Guxlsixl goxr a sser ddu ciza-hanga lei bei har zaxr jjia nia. Bir dae a bbeix, tarxi zix su zix, abadeil yaxr su yaxr, ake geso su geso.

Halcar nael, cirhhexrhhexr a nael, zzaexggu gga tarzzei ar zzei dae, yel ake gga capor ddei mel tarzzei bil ssi nia. Eilzzu geso har jjia ho a, zzojjix zzor zi ci a nael, duixlzi niaxl. Argaxl nael, veixr nolba hor ddei caer dae a, zzoseixl-lorseixl zziseixl-horseixl caer dae a, tarxi ardoxr deix dae a, boxzax ar cual vei dae a, hexzzi nol dae a nael, ggucirmi Guxlsixl zi ssi du a. Yel zi dil xixl lei a nael dder almeixr zzor cexr a. Almeixr zzor car mel tarxi kar nia. Yel tarxi kar dae a dder middur ddei leil zzo ho lel lalnga. Halae seivi lei a lei yaa zzirdae a hazzi gaxggor seir. Guxlsixl xiugge cir xixlmei mel, ca cirddei-hanga lei qihher cir nia. Halcar camar mel bbeix: hal cir xixlmei qihher nr cir arddeirnga a mel, zzo zzor a si dax ggaxrmae nr xie leilei, eine bbeix.

Giedae cir nehe ci a nael, capor ddei nael neixrneixr-sisi ha du lei a, zzoseixl-lorseixl horseixl-zziseixl vei dae a, seirpor xi dax ssi a, neir ho zi ssi. Halcar camar mel bbeix: hal cir nehe mel neixrneixr-sisi ha du nia. Eine nga a mel, cir koxl ceinir xiu lei ha du ddo, eine bbeix. Hal cir nehe yixrhe arddeirnga a mel, daemi luzzi yixr leixr leilei, eine bbeix.

Eilboxl nael, hal cir xixlmei nael, kax gga su mel nael, tarzzei dae su hal hhexr ake ssi a, hal zzei leil za dae a ggo zex nei azo lerler tiuxl, eine bei su lei zza.

Halcar mel dirsir igax ddu lei nr zza. Yel capor cirmemel a nael koxl baer ssi. Koxl baer a mel, cir hhexr dax arcixl baer, yel zzipbaer dox teixl lei a zzipbaer dda. Eil hhexr dax baer a nael, hal hhexr dax ci, cirmemel a zzipbaer lei ddayixr. Halcar nael zzipbaer dda lalnga; eilcar leixlsu mel nael halae yix seixl lel, yel cir xixl-lorbba mel dder eine baer merteir.

Nael halcar mel, duixlzi ha niaxl ho a mel dder ddeix teixl cir ni zzeze lei, ssormaer ha zza mel dder si dax ddir nr ddo, ssormaerssor yelye arla halmel lei ddir nr ddo. Halcar ddar bbeix a mel, ssormaer mel hal cir ni si dax ddir a mel, si leil nr seir hier mal gger leilei, eine bbeix. Nael eilcar nael, leiddur einezeixl wor-nr-vaer, yel ssormaer mel lei cirdaedae a si dax ddir.

Ddarbel-ddarqiar leil halae bbeix, ddeixteixl hal cir ni ajjix dox pixl nr ddo, pexrzi gga ji dae a zzeir da lalddo. Nrnga a mel, arddolcar yiji gga ssi ci a mel, ni ajjix dda jjia nr xie lei, eine bbeix. Nael leiddur eil ddei mel, eilleix mel nr zza ho a.

Halae halcar ddar bbeix a mel, hal cir ni mel, oldde cir nr ddo. Cir a mel mi gga moxrzzo miur leilei.


Halae hal cir ni mel, zzeir mel leil lei si dax ddir lol nr ddo. Ddir arddeirnga a mel, jjurjiur-maemae mae ni vei dae a, si leil alddur ddei leil mae ni gaxl gger ssi nia, si dax saxfux ssi nia. Yel Guxlsixl goxr eilleix mel zzeir loxl ssi su lei nr zza, zzeir mel leil zabbar zol bbox dae saelnga.

Ddeixnir cir ni ci a mel, ssormaer mel dder armael ama hhexr leil i jjixr du a. Yar capor nei anix mel leil lei hier xixl dax ddo. Yaa mel hhexrnaexr su naexr, ddar biar su biar. Capor mel nael pexniaxl mex gax su mex gax, eine bei. Halae ca qie a, yaa dax ggo zex lei lol eine bei su lei zza. Halcar mel, ca halmel mel Guxlsixl ceingor zzezze zex ci ddo.

Ca cir mel mel a nael ddeixso bbeixsael ddeixli cir ni ci a nael miar mu beil ssi du a. Miar mu beil a mel, ajjix a cirza bil, cir ar vei bber teixl lei dder suax ddo a. Ssi halcar nael hexzzi ar taex vei dae nael, yar miar mu ggie halmaex doxl ssi. Halae lor ni ci a nael dder lor zze du nia. Lorleix ddei vei dae a, niur zze leil arleixr o du lei nia, zzoseixl-lorseixl horseixl-zziseixl halae horcucu nnel vei dae nei seilzol dexl dae six ar caex vei dax dae, yel arleixr zi ho a nael dder lultur peixl gga dox ji gger a yaa leil zzor lol. Yoxl zoxl a mi mor mel sael a, nnel jjia leil o du lei a nr za sael ssi za lol, yel dder yoxl lorleix ddei vei pixl ddo a.

Halae ca cirmelmel a nael, ddeixli ddeixngor leil nael dder niur loxl beil mu ssi. Niur loxl beil mu ssi a mel, horcucu nnel sael taexl har. Ha carbeix zza arddeirnga a mel, zzo bei lel dax ssi niaxiar a mel, zzo lei bei lel dax ssi ddo. Allur, almeixr, hor, var, zzibbaer nei zzo zzor a sser zoxr mel vei dae a mel dder zzo bei lel dax ssi cexr a.

Nael Guxlsixl goxr a, niur mel leil eine argielggur ggaxr ge a mel, ggaxr teixl a qie beix doxr, ggaxr lei ggaxr wor nr ddo. Loxl ggie ssi ci a mel, niur mel leil dder yaa ddei yaa leil zzor ssi lol a. Ca mel nael hher ggie zabbar ar ddei zo har, yel tarqia ar ddei taexl si lei, yel middur ddei gga cex ji. Argaxl zzo bei mi a mel dder tarqia te leil zi nia a. Yel zzoseixl-lorseixl horseixl-zziseixl cirzahanga lei bei har a dder olddetexl, sozir cu, hexzzi doxl, eine bei nia. Nael hexzzi doxl a mel, ceinir taex doxl nia. Eil ddei mel dder bbeix, cir koxl ceinir xiu lei zzeir mel leil zabbar seilseir a zzaso lol nia bbeix arddeir a. Eine bei teixl ho a nael dder ca mel zzor ddo a. Zzor a mel arsae zzor dil ddo arsae zzor lalssa, arsae dda dil ddo arsae dda; niur loxl pixl a lei nr zzi; ddayixr a lei nr zzi; si mi gga ddir a lei nr zzi. Eine cir koxl gga mel zzeir mel si mi gga ddir a, nr hie lei mel dder niur loxl beil ssi cir ni nga a.



8. Yixrggiessor

Mixbbaex su Loxrlapor mel ddei leiddur mel gierbox dae a, nael cirmelmel a nael halae yilzi a zza dae seir. Eilmelmel dder arsae carbeix zo halmel nga a. Bir dae a bbeix: “Loxrlapor ddei ssormaer-leixlssor mel, sul nr zza dae ho a, capor zo koxltor ci a mel, yarbbor yarma dder yar leil yixrggiessor ar giex bei gger a, yar leil xixl teixl lol a, capor zo lol du a. Yar, yar ddei ssormaerleixl carbeix mel leil yo si lei a cirgo a yixrggiessor gga xixl dae ho a mel, arddol su caleixlssor lei yaa dax cual lei ddo. Yixrggiessor gga xixl a mel, cirmuzil a xixl su mel nr bba a cirddeiddei a zza. Arseir lei carbeix yo a so liler, li ngorler eine xixl lalnga. Cirmuzil a xixl a mel gaxggor nr seir, yel dder carbeix yo si lei a cirgo a xixl, cir daedae a yixrggucissor cir bul leil lei ssormaerleixl soler liler yixr, yixrggiessor cir giex gga nael yixrgguci cir bul bbeixsael nr bul dax ji. Mixbbaex su cirkax-

hanga ssormaerleixl mel lei ciryoxr a nga, koxltor ci a dder xixl teixl du a.

Eilboxl nael caleixlssor mel ssormaerleixl xixl teixl su zza saexl ho a nael dder cual ssi du a. Eilmerxixl ci a nael, miar mu a veixr labox pia tox arleixr lael teixl, qihher arleixr cir, nael sixrdir sixryixrdir sael ci a, camar mel yixr jjia ho a nael, yaa dder ssormaerleixl dax cual ssi du a. Ha xixl teixl su zza a mel dder arddol kax dax lei cual ssi ddo. Li ngorcei koxl xilmeir leil mel cual ssi a lei qihher ssi mal nia. Nael eilleix eil coxr nael arseir lei ssi bbaeyo a, moxrtoxr zzaer si lalnga a.

Caleixlssor mel ssormaerleixl xixl ggie ssi ci a, caleixssor gayoyo arla halmel nga a nael, yaa yixr lei zabbar seilseir arla alddur ae ssi, yel ssormaerleixl mel lei yaa leil ggapu gger var. Nael caleixlssor cirmelmel a aelgaxr a yel yaa alddur ae nr nga a nei, alddur tiex. Ssormaerleixl mel dder yaa leil ardoxr vuxryixr. Nael alddur tiex su eine mel nrbbba a cir cir cir a zza. Eilboxl nael alddur ggapu gger ho a nael, caleixlssor ssormaerleixl mel dder zzi dax ddar biar gax du a.

Eilleix leixlsu eil coxr nael li ngorcei koxl hal coxr dax ardar le-nr-sel a; yaa nael yarzi zzar. Caleixlssor mel alddur ae lei a nael, arleixr ae a nael dder alddur ggapu gger du a. Halcar hal coxr nael, leiddur bir yaa leil ardoxr miur. Yaa mel caleixlssor ssormaerleixl zzi dax “ssexrcixrhuaxl” bbeix doxr nia zzor. Nael

caleixlssor mel ssormaerleixl dax bbeix wor nr xie arddeirnga a, ssormaerleixl mel dder yaa leil alddur ggapu nr gger, nr cual lol eine bei zzor.

Caleixlssor mel arcixl cual ho a nael dder jjixr du a, yaa dder ssormaerleixl mel leil qie a bbeix: “Ssormaer-leixlssor ngua leil ho ssi ddo a mar!” eine qie. Nael eilboxl nael ssormaer-leixlssor mel nael yaa leil qie xixl a bbeix: “Caleixlssor nia ngua dax xixl dae ddo a mar!” eine qie xixl. Eil ddei mel leiddur ar ddei a zzi leil eine qie arnar, ssormaerleixl mel lei sopapa arla caleixlssor mel leil nr ho ssi lei. Caleixlssor mel lei sopapa a nr xixl dae lei. Eine qie ho a nael, caleixlssor mel nael jjixr du a. Neixr seir arddeirnga a nael, yaa yoxl kebal kax gga ssormaerleixl mel dax arleixr cual ssi. Lae dae arddeirnga a nael, yaa dder armael ake jjixr du a.

Loxrlapor mel Silpor le-nr-sel. Li ngorcei koxl xilmeir halleix mel bir dae a bbeix, caleixlssor ar ddei a ssormaerleixl ar ddei leil nolnger dae arddeirnga a mel, yar zzalzzar arla ssormaerleixl hal ddei leil: “Ngo ni leil nolnger,” eine bbeix nr gger lei. Yar halae ssormaerleixl hal ddei dax seixlda. Nael yar zoxl a yar caleixlssor carbeix mel leil yo dae a ssormaerleixl hal ddei xixl ggie halmaex cual ssi var. Yel yar, yar ddei carbeix mel leil qie a, ssormaerleixl hal ddei leil qie si, bbeixsael gga si, ssormaer lor, capor lor, cirgo a ake gaxggor, ddar biar, degax, eine bei var. Nael arcixl gaxggor ho a nael, caleixlssor mel dder ssormaerleixl

mel leil yaa yixrggie ho xixl nr ci goxr nr ddo. Eil ddei mel leiddur ar ddei a. Yaa cirgo a eine nr so boxl gaxggor ho a, ssormaerleixl hal ddei dder caleixlssor hal ddei yar leil nolnger dae saexl var a. Saexl ho a nael, yar caleixlssor hal ddei leil nol-nr-nger arddeirnga a mel, yar dder caleixlssor hal ddei leil pa var. Yar pa a mel, caleixlssor hal ddei dder ssormaerleixl hal ddei yar lei nol-nr-nger saexl a; yel yar dder zeixleixr ssormaerleixl hal ddei leil yar, yar leil nolnger saexl lol nr var a, kebal ssormaerleixl mel leil zo box ssi var. Ssormaerleixl ha ddei leil lei kebal caleixlssor yar leil nolnger lei var. Yaa nnel zzi dax nr seir bbeixarnar, nael yaa halae gaxggor carbeix bei cexr.

Nael ssormaerleixl hal ddei caleixlssor hal ddei yar leil nolnger dae saexl ho a, yar lei caleixlssor hal ddei leil nolnger dae arddeirnga a nael, yar lei caleixlssor hal ddei dax seixlda var, nael yar caleixlssor hal ddei leil pa nr var. Nael eilboxl nael, caleixlssor hal ddei ddei carbeix nei ssormaerleixl hal ddei ddei carbeix mel lei yaa nnel zzi leil nolnger dae saexl var a. Saexl ho a nael dder bbecir-bbexixl yaa nnel dax cirgo a gax-nr-ggor a; yaa nnel leil cirgo a ddar biar lol. Ssormaerleixl hal ddei caleixlssor hal ddei dax seir dae ho a, yar dder kebal carbeix nr ca lei, caleixlssor hal ddei dax cirter a yar ake ssi a, yar leil ho ssi ddo a. Eil ddei lei leiddur ar ddei a. Nael ho ssi a lei caleixlssor hhexr ake ca mel leil saexl lol nr ddo, yaa ddar biar a lei arssor a biar ddo, argge-nehe lei mer lei mer-nr-teir seir ssormaerleixl

ddei leil yar xixl ggie ho xixl nia. Caleixlssor ddei ake ca mel leil yar leil mia lol nr ddo. Yar caleixlssor hhexr ake lei goxr a caleixlssor hhexr ake ca mel leil saexl lol nr ddo. Yel yaa yixrmeixl lei nr jjiu zucur doxr dae var. Nrnga a mel caleixlssor hhexr ake ca mel ha du ho a mel, ssormaerleixl hal ddei dder jjixr wo nr xie a. yoxl caleixlssor hhexr ake ca mel miar mu ssi jixr a sael yar jjixr cexr. Nael eine mel zoxlzoxl a nr zza. Nrbba cirddeiddei a zza. Loxrlapor mel caleixlssor ssormaerleixl zzi dax seir dae zzi leil ho ssi ddei mel hherdder Silpor zzi dax seir dae a zzi leil qie a lor dda ssi almeixr zzor ssi halmel sael a nga. Ssormaerleixl hal ddei caleixlssor hal ddei leil ho ssi car, yar caleixlssor hal ddei ake xixl dae var, nael yaa nnel zzi dax naer nr var. Eil ddei mel leiddur ar ddei a.

Eilboxl nael yaa zzi dax argielggur seir ho a nael, yaa dder arbbor ama leil saexl lol du a. Saexl ho a nael, capor hhexr yarbbor yarma dder nixixl arleixr i a nael, fujiul nnel qie a nael, zzipbaer ardoxr yiexl dae a nael, caleixlssor hal ddei leil maerssor meixl gger ssi du a. Fujiul eil nnel mel yaa ggie baxl zzeze lei yaa lei guaxr gger; zeixleixr qie box nr ssa a. Fujiul hal nnel ssormaer hhexr ake nr za ssi loci a mel, caleixlssor ddei lei ca dae nia. Yel ssormaer ddei yarbbor yarma leil “pormo” ae ssi. Ssormaer yarbbor yarma ddarkoxl arddeirnga a mel, yaa nr hhexr dder ggie baxl labox sirzzir mel bei zaxr ddo a. Fujiul nnel so za ddei ssi loci a mel, capor hhexr leil cirmusixl hier gger ssi

arddeirnga a; yel caleixlssor ddei nael nr ssi goxr nr ddo.
Yarbbor yarma mel nael ssi dax nr ssa, hier si lei ho a mel dder
yaa hhexr ca nga a; goxrsol-goxrnaxr lei yaa dax goxr dae nia.
Yel capor zo a mel, zabbar-seilseir a zo nia, capor ssormaer lei
xiar ver a sael nei zzicarzzi dax ssi ddo.



9. Ggie Baxl

Ngua mermi ggie baxl a mel so ni baxl nia. Xilmeir cir ni nael xiaba bei, ssormaer hhexr lei yaa ddei cirssor, gaxggor carbeix nei jiacux mel yaa leil bei jiu lei a xiaba bei, capor hhexr lei ciryoxr a nga. Xiaba bei a mel dder tarxi zix, ceirxi ddaexr, duixlzi niaxl, ggie baxl a sser ddu zzaegu mel ngol zaxr, halae arggeni capeixlni zzorddu mel bei har zaxr. Yel zzojjix zzor car mel dder tarxi kar ddo a.

Argge-nehe ci a nael mixlyixrsixl hhexr dder cirmusixl ddei leil zi lei du a; nael yaa lei car mel fujiul, fuzimo nei mixlyixrsixl carbeix eilmel ca dae nia, yaa halae ko, hor, zzibbaer, zzorddu eil zzu bil dae nia. Yaa ssormaer hhexr ake ssi ci a mel, boxzax piur nia. Eine nga a mel ssormaer hhexr ddei piar gga ca mel dder yaa lei a saexl a. Yel ssormaer hhexr ddei piar gga ca mel dder yaa leil alddur ddei dax bbiur gex dae a zzibbaer nr bei sael

dda lol ho a sael tavuxi giex gga ddir lol. Ddir ci ho a nael, fujiul nnel dder cirmusixl ddei yarbbor yarma halae yar ddei cirssor mel dax ddar biar doxr nia. Yel arcixl biar ho a nael, yaa nnel dder cirmusixl ddei yarbbor yarma leil pia sixl gger, cirmusixl ddei cirssor mel leil silbbiur gger.

Yaa eine arcixl hher ho a nael ssormaer hhexr dax seivi mu lei su mel lei lei jjia ddo jiur a. I dae a seivi mel lei jjia ho a nael dder zzo ho du a. Yel ssormaer hhexr ddei piar gga ca mel leil xilmeir ho zol nia. Yaa zzor dae car nael fujiul, cirmusixl, mixlyixrsixl mel nael yaa leil yi bae, suilgoltaxr bae, zzibbaer bae ssi nia. Yel seivi mel zzor teixl jjia a saelnei cirmusixl ddei leil zi lei su mel nei cirmusixl mel zzor wo ddo. Yel yaa arleixr zzor ho a mel, cirmusixl ddei piar a gga ca mel mixlyixrsixl ddei piar gga ca mel leil almeixr faex, zzibbaer guax eine arcixl corgax nia. Nael yaa eine gaxggor dae car mel, cirmusixl ddei nei yar cirmusixl carbeix mel dder pia lael zaxr jjixr du a. Yel yaa arcixl gaxggor ho a mel dder cirmusixl hhexr ddei porpor hhexr leil oldde arleixr texl ssi, yel dder cirmusixl ddei leil hier dae a mixlyixrsixl hhexr ake hier si du a.

Nael cirmusixl yarbbor yarma mel ssi nr dax, cirmusixl ddei yarjiul mel nael ssi nr dax goxr nr ddo, halae yoxl yar ddei gaxggor carbeix nei seivi mu lei su mel dder ssi dax nia. Nael yaa ssi car mel, mixlyixrsixl ddei nei cirmusixl ddei leibbei ddei leil jixlzi ar pir gaxl dae nia, cir ddei saxr nilni ar peixl ddaexr dae

nia. Nael ddux car mel, cirmusixl hhexr ddei piar gga ca mel mel mixlyixrsixl hhexr ddei piar gga ca mel leil alddur ddei dax bbiur gex dae a, zzipbaer seirseil a arleixr guaxr gger a sael yaa leil ssi lol.

Yaa jjiimo baxlluxl gga ssi dae car mel, arseir dax zzi a lei arseir leil zzipbaer bae nia, suilgoltaxr bae, yi bae eine bei nia. Yaa laxiur leil bbeixsael vize leil gger eine nga a mel, cirmusixl ddei leil mel bber gel nia. Yel jjiimo cir zex gga lei pexniaxl mex dae, baerlae lei mex dae, meixrggoxr ae no ae, yarzi uxnix. Nael eilboxl nael, ssi dae ssi dae nael, mixlyixrsixl hhexr ake ssi ci ddo jjur a nael, mixlyixrsixl hhexr ddei piar gga ca mel nael, yoxl yaa leil ggucirmi zi dae nia. Halae halmaex meixrggoxr arcixl ae doxr a sael ddir wo ddo.

Mixlyixrsixl hhexr ake ssi ci a nael, cirmusixl nei mixlyixrsixl halae yaa dax carbeix mel nael dder mixlyixrsixl ddei yixrggie ddir a. Kebal fuwor mel nael, tavuxi gga cux su cux, zzaexggu gga cux su cux. Yaa cux dae car nael, mixlyixrsixl hhexr ddei piar gga ca mel nael, yaa leil lor bae, zzipbaer bae, silbbiur vizu bae eine bae nia. Yel yaa bae teixl ho a nael dder zzo ho zol du a. Fuwor mel nael dder heixller heixller cir zoxr, cirmusixl nei mixlyixrsixl nael yar dax carbeix mel dax cir zoxr a zzor. Carbeix miur arddeirnga a nael, nr so zoxr a lei cirgo a zzor. Yel zzi leil almeixr arleixr faex gax, yel zzor teixl a nael dder tiuxl gax du a. Halcar nael, ggo zex su lei zza, nael eilcar mel, qixrcaxrwul tiuxl

su a miur a. Leiddur dax zox dae a mel, ha tiuxl a mel dder tiuxl merteir nia.

Argge-nehe ci a nael, mixlyixrsixl cirmusixl nei yaa dax carbeix mel halae fujiul mel nael seirpor xi gga olddetexl ssi nia a. Olddetexl ho a nael, almeixr faex no faex eine arcixl gaxggor si lei a sael jjixr lei. Jjixr ci ho a nael, yoxl mixlyixrsixl hhexr ddei porpor, loxzoxl, zzobeimo zzu leil olddetexl jjixr lei.

Eil zzu bei har jjia ho a nael dder seivi mel leil zzo ho zol du a. Yel seivi mel zzo zzor dae car, cirmusixl nei mixlyixrsixl yaa zzibbaer nei suilgoltaxr bae ssi nia. Bae dae car nael, mixlyixrsixl ddei dder cirmusixl ddei leil pormo ssexl mul gger du a. Mixlyixrsixl ddei arsae ae nael cirmusixl ddei arsae ae mae dae a dder ddo a, seivi maelmaerjjia leil lei eine nga nia. Yel mixlyixrsixl hhexr ddei seivi mel leil maelmaerjjia ho zol teixl ho a saelnei fuwor mel leil ho zol ddo. Yaa leil maelele sael ho zol a mel, yaa leil almeixr faex niazzir, zzibbaer guax niazzir a nga arddeir a.

Nael zzorbbexr ho a mel, cirmusixl nei mixlyixrsixl halae yaa dax carbeix mel nael miar mu beil ssi du a; seivi mel lei jjixr dae a. Fuwor mel lei jjixr du a, nael yaa jjixr car mel mixlyixrsixl hhexr ddei seivi nnel sael gga xixl si nia, eil ddei mel leiddur ar ddei a. Mixlyixrsixl hhexr ddei seivi mel leil cirmusixl hhexr ake gga xixl

ci ho a nael, yaa leil almeixr ar bbi bei zol a arcixl gaxggor, nael dder yaa leil jjixr lol du a.

Nael mixlyixrsixl hhexr leil xiaba beijjiu su mel nei cirmusixl hhexr leil xiaba beijjiu su mel nael zzaegu mel arleixr ho xixl jjiu nia. Zzaegu mel ho xixl jjia, seivi mel jjixr jjia a nael, ggie eil caxr nael dder baxl teixl a.

Cirmusixl ddei mixlyixrsixl hhexr ake so ni hher bbi a, mercixl a nael yaa capor maerssor nnel dder zzorddu ardoxr vei dae a ssormaer hhexr ake jjixr ddo a. Nael eilleix fu teixl ho a ngaseir nael ssormaer ddei mel yarma hhexr dax hher miur. Arddolcar aniux zza ho a nael, zoxlzoxl a capor hhexr dax hher lalddo, yar mel dder capor hhexr ca loxr gaxzi ho a.



10. Miar Bei

Sul zza nr teixl a, kebal mermi miar nr bei ssi su ca mel dder ake hher dae a, mi paxr lalnga a. Nael ca cirmelmel a nael, yaa ddei mi fel si leil paxr lol a, kebal wor mu ssi su lei zza. Nael mi mel si leil paxr lol a mel, yaa paxr nia-nr-zzir bbeixarnar, yaa halae mipaxrsu a nga.

Halae capor cirmelmel a nael, mojiuxr bei var loxjiuxr lei bei var. Yel si yaa leil qie su zza a nael, yaa si leil bei gger ssi cexr, yaa worper ardoxr sulku wo a lei, nael yaa halae yaa ddei mi fel paxr dax dae seir. Halae ca cirmelmel a nael, zzaegu vur su lei zza, nael zzaegu vur su mel lalal sael a zza. Cirmelmel a nael, no i var, yaa yoxl si leil no lei arleixrleixr i gger dae.

Halae yoxl sulmulsu lei arddeiddei zza. Nael halmel nael mi paxr nr ssa, yaa mel zzirbae zza. Yaa ngorcei koxl loxr a nael dder sul mul nr ssa a. Nael yaa halae zzirbae zza.

Halae eilleix leixlsu mel mel kebal mermi wor mu ssi su lei yarzi miur. Capor maerssor lei ssi. Marsu mel nael ake bei, anix hier. Vimir ggie miar bei ssi a mel, zzirbae bei wo ddo, halae ake mi paxr mel sael a sul-nr-ku. Cirmemel a nael Guxlsixl goxr a sael jjixr lei; cirmemel a nael, nr so koxl saelnei ar boxl jjixr lei.

Mipaxrsu mel nael, ca cir ddei a daemi yil mur zza, halae hielmi lei armel zza. Mipaxrsu mel nael, arddolcar paxr nr ssa eine ar ddei nr zza, yaa bei var zzezze lei bei dae nia. Nael mar a, hazzi bei nr var halmel nga a nael, yaa ddei ssormine mel yaa leil ba a. Yaa leil bei gger lei a, yaa lilbol-lilmo hier gger dae lalssa a.

Nael Mixbbaex su cirmemel a zzeir lei zeil miur: acixl, niur, mur, tarlodaex, veixr, yix, azo zeil su lei zza. Cirmemel a nael, niur zeil miur; cirmemel a nael, acixl zeil miur. Nael niur zeil miur su nei acixl zeil miur su mel nael, cir koxl ceinir xiu lei zzeirloxlsu ar ddei zza, nael zoxlzoxl a mel camar mel loxl miur. Halae si leil loxl dax gger su lei armel zza. Nael yaa si leil cir koxl bbeixsael baxr koxl loxl gger bbi ho a mel, yaa leil zzirbae gger nia. Nael veixr zeil miur su mel nael, armael seixl lel labox mel dol teixl ho a nael, kebal halmel nael yaa yoxl zzirbae vur. Mixbbaex su mel veixr nei yix seixl lel lalnga, kebal halmel hormo sael a seixl nr lel. Mi mor nei zeil vur lalnga.

Eilmel mel dder Mixbbaex su ca ddei bei zza wo mel nga a.



11. Sul Zza

Ca mel zzirdae a middurbbor ca mel Silvu te nr var a dder zzicarzzi dax ddar biar nr cexr. Nael eine nr nga. Middurbbor mel ddar hormo yoxr te su ca zza. Cirmelmel a nael, armael ddei ddar mel te var, halae kebal su ddei ddar lei te var. Nael cirmelmel a mel armael ddei ddar mel lar te var.

Hherdder ngua Mixbbaex su ca mel sael a nga. Ngorcei koxl xilmeir leil mel, ngua mermi su ca mel mel Silvu te var su ca mel nrbba cirddeiddei a zza; Silvu te nr var su mel miur. Yel halleix yaa sul zza ssi a mel, Silpor sulmulsu mel yaa leil mul gger lei nr cexr. Silpor mel yaa leil mul gger lei a, yaa noni wo nr xie. Yel ngua Loxrlapor Silvu saexl su mel yaa leil mul beil lol nia. Eine nga a mel, zza dae zza dae a mel, yaa dder Silvu lei arqierqier te var a; halae azo nr saexl zza arddeirnga a, sulmulsu ddei leil biex ddo.

Nael yaa sul zza tor halleix mel, arzzi-nimar arzzi-nimo lei yarzi miur. Yel vaervaer nr hieni sael sul zza ssi a mel, yaa ddei arzzi-

nimar arzzi-nimo mel leil lei hier dax dae saelnga. Halleix mel, ssormine miur, yel yarzi sol, sul zza ssi a lei pia sixl veixrddu nr zza, sul lixlba sixl bberddu nr zza, cirddei-hanga ggiexrtaexmo ar ddei bber dae lalnga.

Halae halcar mel, gofei mu a almeixr zzor lalnga, yel yarbbor yarma nnel a ssormine ar ke leil mu zol bbox nr xie, yel arseir hhexr lei cir nr so koxl zza a dder camar leil miar mu jjiu lalnga a. Nael ca miur a bbesur zza hal hhexr nga a nael, yar yoxl zza bixryixr lol.

Nael eilleix eil zeix nael halleix hal zeix leil bbeix a, nixixl ddei goxr gel ddo dae a. Eilleix eil zeix mel ca cir hhexr a ssormine nnel a hier wo ddo, yel camar mel lei halleix sael a sul-nr-ku a. Mi mel lei cir hhexr cir hhexr leil bbe zeix gger lei ho a. Gofei mu lel nr nga, yel arseir hormo sulku wo xie lei armael ddei nga a; gofei jia nr ssa a. Yel arddol hhexr lei anix mel zza yuex a mel dder yaa leil lei zza bixryixr lol.

Nael eilleix eil zeix mel, sul zza ssi a lei cirza-hanga lei bir halleix leil seir a. Zza ssi beil a nael nixmox ye, Silvu te nr var seir, yel halleix sael a Silvu saexl su Loxrlapor ar ddei mul lei lol, yel Silvu lei mul, Loxrlavu lei mul. Nael cir koxl zza ho a, zeixleixr hal koxl zza ssi a mel Silpor mul lalnga a.

Yixl goxl xiqi leil nael ngor ni a zza. Eilneixr-nehe nael cixrdirzo (7:00) zza du lei, yel sixrdirzo (10:00) ci a nael, almeixr zzor jjixr.

Almeixr zzor teixl ho a nael, yoxl sixraeldirzo zza du lei. Yel wurdirzo ci a nael, yoxl ake jjixr lol. Eilmerxixl nael zza nr ssa. Sul nael, ceicei yoxr sael zza dae, yel cir ni qiuxl jiexr koxl ddei gga mel cirza ar jiexr zza. Ake jjixr a halae sul bei jjixr nia.

Sul zza faxlxixr ho a, halae zzirga six doxr nia. Xiqiyixr nei Xiqi'ael nael cirba-lorbba zabbar seilseir a six doxr nia, kebal hal nr ni sael gga nael nnel-nnel luixr dae a six, kebal halmel nael dder ake jjixr ddo a.

Ceidil Zalxiu gga mel merteir lae, halae mixpiu zzae mixpiupiu, zzix zildu. Qiaxrmeix lei zax ni jjia, jjiuno car gga lei yarzi yoxl. Yel yelye mel leil giel de zei doxr, cirdaedae a yarbbor yarma mel yaa leil ho xixl. Sulzzaggie jjixr ci ho a lei yarzi zzix, leixrhher lei zax ni jjia, sul lei vaexr nr var. Argaxl merni ddux lei a zzae merni su ga doxr.

Eilleix nael, sulzzaggie xi mel lei yarsixl zi box gger a, ardoxr lemel, halleix mel sulzzaggie ggiexrtaex a yarzi zzix.

Cir caexr zza jjia ho a nael korsil du a. Korsil teixl ho a nael, cir nr xiubbo sael faxljiaxl. Nr caexr zza ho a nael dder ar zixr ddeix du a. Xiarxiuxr qiuxl koxl ddei nael ngua dax nalbbor zza dae lalssa. Nael cuzo zza ci a nael, Silpor dax zalbbor zza ssi nia. Yel ake jjixr ci nr ddo a, zol xixl dae nia. Yixl goxl xiqi leil cir boxl a jjixr lei cexr.

Nael ho bei ho mel cirza-hanga lei yarzi seir a . Arddolcar nael, cuzo zza lei a ngua dax zza lalssa lei saexl nr ddo. Eine nga a mel dder seir a , cirza-hanga lei maxrfaxr nr ssa a ; aniux lei ggese, camar lei ggese a .



12. Vixlux Naexr

Ngo vixlux valala ar taex nei vurgoxlxixr ar taex naexr. Yel hoba biurbul so zir biur. Yoxl yaryoxr ar ddei vei si lei a ddaex. Ddaex ho a nael, teixlsibbor kemil ar ddei deix. Yel yarher leil naexr du lei. Naexr du lei ho a nael, kukurzzar kemil zzu ddaex pixl jjia. Yel yoxl vixlux ddaex dae a, zabbar a diexr gex a naexr. Naexr teixl ho a, kebox ar ddei niaxl gex. Yel arleixr nixl bbae a dder ddo a.



13. Loxrlapor Ddei Pia

Mixbbaex su Loxrlapor mel mel yaa armael ddei pia armel zza.

Halcar mel, Loxrlamo mel armael naexr teixl lei pia mel veixr lalnga. Yaa miar mu a veixr dae mel nael hormosael igax nr zae, nael cirmusixl mu a mel, cirmusixl pia zaelzae arla ar tox naexr nia, yel yaa cirmusixl mu car veixr labox bei. Nael hal tox mel yaa cirmusixl mu a veixr teixl ho a lei zoxlzoxl a veixr nr vixr. Zaxr dae a seivi mu ssi bbeixsael zae ggie ssi a sael veixr.

Loxrlamo pia cir tox a mel ngor yoxr zza. Goxrdoxl ar peixl, leixrniuxl ar xiux, pia ar xiux, oltex ar zex, maelsael ar zex. Eil ngor yoxr jjia nga a saelnei cir tox bbeix cexr. Nael cirmelmel a oltex zex neixl nia-nr-zzir a nael, yoxl nr neixl lei ddo.



Goxrdoxl



Leixrniuxl nei Piaddomo



Pia nei Leixrzzir



Oltex


Nael goxrdoxl leixrniuxl nei pia naexr labox halae oltex naexr labox mae mel nael ho si lei lalnga, armael bei nr var. Goxrdoxl nei leixrniuxl naexr labox mae nael zoxlzoxl a neixlneix sser, nael cirmemel a nael kebal mae sser su lei zza.

Pia naexr a nael, vibox nibaexbaex sser a naexr. Cirmelmel a nael kebal yixrsaexr vibox mel sser a naexr su lei zza. Nael oltex naexr a mel mae neixlneix lar sser ddo; kebal mae mel sser nr ddo.

Nael cirmusixl pia naexr a mel, goxrdoxl nei leixrniuxl nael mae neixlneix sser. Pia nael vibox nibaexbaex sser a naexr; oltex naexr a lei dder mae neixlneix sser; kebal yixrsaexr mel sser nr ddo.

Goxrdoxl leixrniuxl mel nr naexr seir mel, hoba vixlux bei har zaxr nia. Zoxlzoxl a mel arseir lei goxrdoxl xia labox, leixrniuxl xia labox nei leixrzzir xia labox vixlux mel mel neixrneixr-sisi dder bei dol zaxr dae a. Eine nga a mel, cirmusixl mu zi ci a, pia naexr a mel dder einezeixl naexr nr jiur a.

Vixlux bei a lei mae ho ssi nia. Nael vixlux bei a mel, maebbox nr nga a mel dder arddolyox yixrsaexr mae lei sser ddo. Nael yarzi tu halmel nael sser nr cexr.



Vixlux (darsisi)

Leixrniuxl naexr a nael, vixlux darsisi nr zex, niulddurddur ar zex sser zoxr. Yel mae ddei ho si lei ho a mel dder zzi dax kuaxkuax arla darsisi nr zex; niulddurddur ar zex diexr mal gger. Nael mae ddaex car mel, mae sixllexr ddaex nia, mae zzar ddaex nr ddo. Ddaex teixl lei ho a darsisi nr zex siggiebbaer nr loxr arddeirnga a mel, niulddurddur mel vei a, zol ngexl dax ddo.

Ddaex har ho a nael, yoxl sul ardoxr gex mel sser a, mae ddei kuaxkuax de a mae ddei sul ddei leil diexr gex. Eine nga a mel, vixlux bei car dder bei seir a.

Vixlux bei labox mae ddei diexr har ho a nael, yoxl vixlux ddaex. Armael ddaex var arddeirnga a nael, armael ddaex; ddaex nr var arddeirnga a mel, si leil ddaex qie ssi cexr. Yel vixlux diexr loxr ho a nael, yoxl vixlux ar taex, veixhher ar taex, jiulgiex jiulgiex mae zex leil diexr gex. Yel dder vixlux bei cexr a.

Leixrniuxl xia loci a nael, darsisi nr zex nael maemo ddei leil cirbbaer ar zex xia ngexl. Niulddurddur zex nael, piamael ddei leil xia ngexl. Piamael ddei leil mel leibilbil ar taex naexr nia. Cirmelmel a nael vixlux niulddurddur zex dax naexr ngexl dax; cirmelmel a nael hal taex lillil a naexr.

Halae yoxl piaddomo giexrluxl lei nr taex bei nia, yel piaddomo naexr loci a giexrluxl ddei gga naexr ji.

Goxrdoxl xia labox vixlux nael arseir lei nr teixr bei. Yel nr teixr jjia a lei quixl zex nga nia. Nael goxrdoxl vixlux mel nael, leixrniuxl vixlux mel sisi bei nr ssa, jiasibbor teixr nael ardoxr kuax, ggaxrssibbor teixr nael ardoxr zaex.



Goxrdoxl Giexrluxl

Yoxl goxrdoxl giexrluxl lei nr taex bei nia. Yel goxrdoxl xia car giexrluxl ddei gga cirbbaer ar taex xia ji. Halae leixrzzir vixlux lei bei nia; leixrzzir vixlux lei nr teixr bei nia, jiasibbor teixr nael

kuax, ggaxrssibbor teixr nael zaex. Yel leixrzzir nr bbor jjia mel vixlux li zex bei nia.



Vixlux

Vixlux mel bei har jjia ho a nael, arddolcar veixr zoxr nael dder arleixr xia lalssa a. Nael cirmusixl pia naexr a nael, veixr yoxljiur dae a dder naexr nia arnar, zoxlzoxl veixr dae goxrdoxl leixrniuxl mel xia a mel, arsier lei Guxlsixl goxr dae hal nr ni sael xia miur.

Leixrniuxl nei pia naexr a mel, ardoxr naexr sol. Ca ddei arsae veixr hoxr ddo ddei dax zox dae a, yaxlzi ddei giexl teixl lei nia. Goxrdoxl naexr a nael, ni arsae kuaxkuax lizoxr nael dder sixlfa ar ddei ddaex teixl lei a, vixlux mel hal ddei leil xia ngexl lalssa a.

Leixrniuxl xiux mel leixrzzir nr zza, nael pia xiux nael leixrzzir niar dae, yel pia xiux mel leixrniuxl xiux kukur veixr labox a.

Leixrniuxl xiux mel giedaebbaer piar mel piaddomo ar ddei zza, yel giedae piar mel bir xilmeir piar leil si leixl. Goxrdoxl peixl nael xilmeirbbaer piar gga neixl labox. Eine nga a mel dder xilmeir giedae lei dder ciryoxr sisi sael a nga.

Vixlux ddei xia ngexl ho a, halae xiartiuxr nr zex guir nia saelnei jibixl diexr ddo. Jibixl diexr loci a nael dder jibixl vur ggie ssi a vae ssi. I dae a arddol ddei zae, arddol ddei peix hoxr ddo nael dder arddol ddei vae si leil a diexr ngexl. Nael zoxlzoxl a mel arseir lei bbobbolbbo halmel vae a diexr meixr.

Goxrdoxl peixl leil mel zilele mel xialxuxu ar zex diexr ngexl nia. Eine nga a mel dder i dae a i zae a. Halae yoxl maebbox ho a, goxrdoxl maelsael ar kae naexr nia. Yel goxrdoxl peixl leil diexr ngexl, eine nga a saelnei goxrdoxl peixl neixl gex ver ddo.

Goxrdoxl maelsael kae mel, ddaexr labox piar mel giexrluxl soler de teixl lei nia, yel giexrluxl cir ddei leil seilzol ar pex dexl ngexl. Eine nga a mel, ddaexr dae a dder i zae a.



Hhexrturxi

Halae yoxl hhexrturxi lei ar taex naexr, yel goxrdoxl peixl leil diux gex. Hhexrturxi taex naexr a mel, mae nr seixr ddaex a, cir seixr leil vixlux ar taex bei ngexl. Bei teixl ho a nael, yoxl nr seixr a zzi leil dux ngexl gger a, naexr gex du lei. Yel agala nael lo ar ddei zza. Lo ddei mel dder hhexr cex labox ddei nga a. Ggaxrssibbor piar gga nael yarsael ar zex dextl ngexl. Yel hhexrturxi taex gga sae teixl lei a, goxrdoxl maelsael ddei leil diux gex cexr. Jiasibbor piar nael, seilzol so zol diexr gex. Eine nga a mel, goxrdoxl maelsael ddei leil diux gex dae a mel dder igax zae a.

Leixrniuxl nei pia xiux leil mel halae laexsaer dextl nia; eine nga a saelnei veixr cexr. Laexsaer lei dder vae ssi lalssa a. Arddolyox laexsaer lei zza, arseir arddol mel lizoxr arddol mel vae si lei a dextl lalssa.

Eilcar, cirmusixl mu a mel oltex zex leil lei jibixl diexr nia. Nael cirzex-lorbba leil diexr arddeirnga a mel, jibixl hormo vae nia. Yel peniar miur a; arseir lei neixl du lei ho a, mia ddo ggie halmaex lar diexr. Oltex zex leil jibixl diexr a lei dder armael arsae lizoxr arsae vae si lei a diexr lalssa.



Paedu

Cimusixl mu car nei, leixl seir eilleix nael oltex lar neixl, nael camar cimelmel a nael qiuxlcei koxl loxr a nael dder paedu lei neixl a.

Paedu ddei mel mae neixlneix sixlfa arla ar co a. Yel giexrluxl cir piar a leil mel jibixl kuaxlkuax arla ar zex diexr dae. Halae giexrluxl cir piar leil nael laexsaer ar taex dextl dae. Cir piar leil nael laexsaersael dextl dae, yel laexsaer taex kiex gex. Neixl car mel, jibixl diexr dae giexrluxl ddei nei jibixl nr diexr dae giexrluxl ddei mel cirgo a de xixl lei nia. Eine saelnei neixl cexr.

Halcar camar ddei leiddur dax zox dae a mel bbeix, cirmusixl pia naexr a mel, pahher dae a naexr nia; si leil mia lol nr ddo, eine bbeix. Nael eilcar mel, eine nr nga a. Si cirmelmel a armael naexr teixl nr xie arddeirnga a mel, halae si leil qie si lei a naexr jjiu lei

lol su lei zza. Eilmelmel dder cirmusixl pia naexr a arsae lerler naexr biar dae mel nga a.

Naexr teixl ho a, veixr loci a nael hoba pia xiux veixr. Yel laexsaer mel kiex gex har a seilnei leixrniuxl xiux veixr deix. Yel yoxl laexsaer mel kiex gex, yoxl zzoxxbbeix ddei dax maelsael zex neixl gex.



Maelsael

Maelsael zex nael vae si lei lalinga. Weixrji sael a cir zex a; nael weixrji sisi nr zza. Maelsael neixl ho a saelnei yoxl goxrdoxl peixl neixl gex. Yel hhexrtuxi taex nael maelsael zex leil diux gex dax dae. Zoxlzoxl a mel piaggezzei veixr du lei ho a saelnei oltex neixl. Nael hoba oltex neixl a sael pia veixr lei yoxl nr zzi.

Mixbbaex su ddei Loxrlamo pia memel luldaddur nr ca dae. Yel vae si lei mel veixr lalnga. Qiuxnex nael qiuxnex vixlux armel naexr var, nael cirmusixl mu a mel arseir lei vae si lei mel ddexr lalnga.

Eilmemel dder Loxrlamo pia veixr a arsaе veixr nia biar dae mel nga a.




**14. Ggo Zex, Pexniaxl Mex, Xixrzi Bbaex Nei Aelfuxr Gga,
Mexlur Mex**

Loxrlapor mel, halae halcar ddei ggo mel zex, qixrcaxrwul tiuxl
eine bei. Nael eilleix mel, arsaе tiuxl niazzir arsaе tiuxl cexr.



Pexniaxl

Nael yaa mel halleix tortor ddei pexniaxl mel leil nolnger.
Pexniaxl mel mel, perler ar taex leil mo ngor caex ssor cex gex
dae, eil ngor caex mel zzi dax me le-nr-sel ngor yoxr me var.



Xixrzi

Yoxl kebal ar yoxr zza nael xixrzi bbeix. Eil ddei mel xil li zex dexl
gex dae arddeir a; yel noni zaezae arla eine bbaex cexr.



Aelfuxr

Halae aelfuxr lei zza. Eil ddei mel niul ddei goxrjia halleix tortor dder sser dae arddeir a.

Halae mexlur ar yoxr zza. Suddu sir su zza, yel mex labox ar su, tor labox qiuxl su, nael mex labox nal piar a nael ddaexrcir du lei nia.

Halae leixrpaе lei ar yoxr zza. Hal ddei nael ssormaer mel mex labox. Hal ddei mel mo niulddurddur ar caex a; yel nalzzarmo bbolbbor arla yelye arla so pir hher ji dae. Mex car nael, hal so pir gga teixl lei a, meir ddei nael mex dae, leixrhher ddei nael gga dae.



15. Loxrlapor Ddei Anix Nei Caleixlssor Mel Leil Biar

Ngua mermi mel maerssor ddei ssormine hier ddo a mel, cirmelmel a nael yarma hhexr dax hier jjixr; cirmelmel a nael yar capor hhexr ake hier su lei zza. Hier so halmel nga a nael, armael ddei armael hier lalssa; hier sol mel nael no i ggie hier ssi nia.

Hier teixl ho a, ceicei ni sael loxr a nael dder lazziddex du a. Nael lazziddex a mel, yar capor hhexr ake ddex jjixr nia. Yel hal cir ni yaa ddei cirssor-naerho nei gaxggor carbeix mel dder xiaxrbeilaxr ddei gga ko nei yixfu bber dae a, pia sixl vei dae a, yaa leil laho jjixr lei du a.

Laho su mel lei ci ho a mel, yaa dax zzo ar bbi zzor si nia. Yaa lei ci car mel, hoba almeixr zzor nr nga a nei, hoba yaa leil horbuzidal zeixl zol nia. Horbuzidal zzor teixl ho a, arleixr loxr a nael dder yaa leil almeixr ho zol du a. Almeixr zzorbbexr ho a, yaa leil xiaxrbeilaxr vei gger car, xiaxrbeilaxr ddei gga yixfu ar taex nei ko ardoxr ji xixl gger nia, eil ddei mel leiddur ar ddei a.

Maerssor ddei xiu mu dae hal xiubbo gga mel, zzor labox mel lei yar leil yixrggie caer dil gger nia. Nael yar xiu bbi ho a, yar leil bulcir gger ho a sael ddux lei ddo. Nrnga a arddolcar noco miur bbaexl camar mel eine bbeix. Yar leil bulcir gger car mel, ajjix lar a leil zaza-lili goxrzeix ar zul weixr gex du lei, yel koqixl ddir lei lol nr ddo. Yar leil nalzzar arleixr bul gger nia. Eine bulcir ho a mel, yar dder zalbbaer ddux a lei nr zzi a; no zixl wo nr var a; miar mu ssi ddo a.

Cir xiubbo loxr ho a mel, aniux ddox leil lei mi ae gger ddo a. Nael mi ae gger car mel, ake camar, mar zzir ddei ae gger nia; capor bbeixsael ssormaer ae gger lei nr zzi. Cirmelmel a nael, aniux ddox leil deix dax si a seirpormar dax ae gger ssi; cirmelmel a nael, aniux ddox leil deix nr dax si lei zza. Aniux ddox leil mi mi gger a, mi ddei mi naxr-nr-cixl arddeirnga a mel, aniux ddox dder gwaer doxr var. Yel yoxl zeixleixr ar boxl mi box gger nia.

Aniux ddox qiuxl koxl loxr a nael dder sul zza ssi ddo a. Kebab ddei aniux mel dax ciryoxxr a nga: sul zza, sul bei, gaxggor. Nael yaa ardoxr vaer ho a mel dder ake camar mel leil miar beijjiu nia. Sul zza xixl lei a nael dder zzo bei, veixr zzo zol, niur ggaxr ge, eil zzu bei nia.

Nael yaa mel xiarxiuxr qiuxl koxl nei cuzo so koxl zza nia. Nael cirmelmel a cuzo nr zza ssi su lei zza. Nr zza ssi su halmel leil

mel, sulmulu ddei yaa leil ake ae lei var. Nael yaa yarzi nr zza ssi arddeirnga a mel dder ake hher dae a, yarbbor yarma leil miar mu jjiu lalnga a. Cirmemel a nael sul zza a zza teixl su lei zza. Nael sul zza a, zza teixl su halmel nael dder zzi gga hher lalnga a; ake nr jjixr lei a; yaa zzi gga hher dae a mel dder miar zo wo so, halae ake hher dae mel sael a sul-nr-ku. Nael cirmemel a nael yoxl meixrmusu lei armel zza.

16. Caleixlssor

Ngua mermi leixl su mel maerssor yarzi bbeix neixr armel zza. Ceiheixl koxl ceige koxl dder bbeix su armel zza. Nael maerssor bbeix wo bbeixarnar, koxltor nr ci seir a mel, anix xiu nr ddo. Anix xiu teixl lei arddeirnga a mel, vaervaerpor mel zzirbae faxr leilei.

Maerssor nr bbeix seir mel nael, yarzi gaxggor seir, ca lei guaxr su nr zza. Nael cirmelmel a yarzi sulkuddo armel zza, miar bei a lei yarzi bei sexr, leixrhher ddei xia lei xia ssei nr ddo. Eil yoxr nr bei zzae hal yoxr bei dae; six bil zi ci a zzae six bil ssi; mur zza a nael mur leil ggaxr dae a jix ssi; me so zi ci a zzae dder me so ssi. Eilleix nael, kebal mermi wor mu ssi su yarzi miur.



17. Cir Koxl Ceinir Xiu Leil Biar

Guxlsixlxiu gga nael ngua six bber nei cinal so eine bei.

Bbexsirxiu gga lil xiu zi ci a, yel ajjix mal, lilvu bei. Arnillixlkoxl cei sil dol dae ddei ajjix gga zix ji dae. Xiu ssi cir ni nael silbbar doxl naxcir ddaexr. Ddaexr ho a nael, yoxl naxcir mel ardoxr her. Her deix ho a nael, cei sil ddei xiu ddo a. Xiu ho a nael, cir ardoxr bbe. Cir bbe ho a, boxrmoxr bbe. Boxrmoxr ddei bbe ho a nael dder ajjix ddei mal ji ddo a. Nael dder hane hher ji dae lol, zoxl a ajjix ni ni dae bbe i dae. Yel baxr xiubbo sael loxr a nael lil ddei dder vaer ho a. Nael dder boxrmoxr ddei vei teixl ddo a. Vei ho a nael boxrmoxr ddei cir a ake vei xixl.

Lil mel leil cir bbe dae mel gua pixl. Halae cir ni ajjix ar boxl i ssi nia. Eilboxl nael yoxl lil moxr nia a. Lil moxr a nael, ceipe hal zzu moxr teixl. Moxr teixl ho a nael, Lixiu gga ci a nael, mi dae ssi ddo a.

Saxngaxxiu gga nael zildaer ji labox nilhar ar be vul. Nilhar vul a nael, naxcir ardoxr vul ji dax. Nael boxrmoxr ar co vul gex dae. Yel argielggur loxr a nael, hal be gua kae a deil me a zildaer ji, ji ho a nael yoxl ajjix ardoxr her.

Her ho a nael yi lil zix si lei a halmaex dae ji. Dae ji ho a nael yoxl ajjix lalal ardoxr her. Her ho a nael yoxl yarggaxrne six armel gol gex a, boxrmoxr bbe gex. Yel zeixleixr ggaxrsibbor seixlpeixl armel bbe gex. Yel so ni loxr a nael, ajjix ar boxl her a, naxcir ardoxr ddaexr. Nael vaer du lei a baxrbaxr xiu sael loxr a nael, vei kae a merni arleixr lexl lol.

Yel heilmi gga so mel caer teixl a, mor pox xixl lei. Sexbex dae labox mel nael sexbex gger so a sexbex dae; yi dae labox mel nael yi gger so a yi ddu ddaexr. Yel yi lil ddei bber si a dae ssi ddo a. Dae ji ho a ajjix her, boxrmoxr ddei bbe gex. Bbe gex ho a nael, yi ddei dax boxrmoxr ddei ar su caex ddu a, yi ddei leil vei teixl lei. Vei teixl lei ho a nael, yar zaza-lili nilhar ardoxr nixl ngexl. Dae ji ho a, almer nr lei arddeirnga a nael, ajjix her ssi nia.

Nox nei ssu halmel lei caer nia a. Caer teixl lei ho a nael, Lixiu gga ci a nael, mi dae nia. Nael hoba ajjix mal ji. Mal ji ho a nael, niur ggaxr si a daemi bei. Bei har ho a nael, lilvu gga lil ddei cir bo cir bo zix si a, cir zzei cir zzei mi ddei gga dae ji ssi.

Nox mi nei ssu mi mel dae jjia a nael yoxl, daemi so mel caer teixl a, mi dae nia a. Dae ho argielggur loxr a nael, moxrzzo doxl, cei

moxr eine bei nia a. Cei moxr a lei ajjix lei hher ssei nr ddo, cir ni cir ni ajjix i doxr dae nia.

Sexbex a sexbex giexl nia, yarzi jiur. Qiuxlxiu, Sirxiu ci a zzae, me a me so nia. Cei mel ne lei nr ddux seir lei si doxr, yel naxcir ddaexr doxr dae nia. Halae, hax a hax kexl. Ne ddux lei a lei naxcir ddaexr doxr dae nia. Ne ddux dae a, olgge niazzir dae a lei bberzzi a bberzzi zzor, bei lei bei wor nr ddo.

Eilboxl nael, eil zzu bei ho a nael, hherdder yi kal zi ci a. Yi kal a lei yarzi sulku. Merxixl-merni lei kal nia. Adoxl yelye nr so xixl nr so ni ggu nia, adoxl vaervaer so xixl so ni ggu nia. Eine nga a saelnei ar luxr kal teixl lei ddo.

Eil do gga mel, yi kal jjia a mel, cei sae jiur mel lei se nia. Cir ni me ar za so xixl lei a nael, miar cirza-hanga bei jjixr lei. Veixr zzo ho jjixr lei; sexbex lei ngaxl ddo; sexbex cili gga dae ji dae nox mel lei caer ddo a. Yoxl nox piulpiu vaervaer halmel lei cir bbae cir bbae dae. Halae nox ggax dexl nia.

Cei ddaexr a nael, cir nr ni caer lexl. Nael yoxl dalgurzi ddei bber si a, mi gga ddaexr ssi. Cei bexl zzu nael mi gga zul ji dae. Ggieddei gga ddaexr arddeirnga a nael, cei bexl ddei hie a mel dder mar du lei.

Nael dae lae halmel nga arddeirnga a nael, Gexiu gga saelnei se jjia ddo. Nael eilmel se jjia a, middur ddei ardoxr hie a mel, ngua yoxl cir bber du a; vimir ggie nael, yoxl caezi qie a gga dil. Gga

dil a nael, mi ddei gga cir dae cir dae ba kae. Ba kae jjia ho a nael, yoxl niur ddei ggaxr si a so xiu ssi du a.

Hoba mor xixl lei a huaxlfeixrtar'a her, yoxl jix bbae a saelnei so xiu ji, zeixleixr ar lal jix. Yel nr ni sael loxr a nael, yoxl ar lal jix, yel yar ddei yar ner dae a.

Nael ngua yoxl yoxl maerlaerbbei sixl, six bber, cinal so, eine bei dae a. Yel yoxl dder loxlmoxr hal zzu leil ardaedae guaxr dae. Goxr dae goxr dae a nael dder yoxl cir koxl nga a.



18. Capor Ssormaer Azo Lerler Miar Bei

Ngua mixbbaex su mel mi dae zi ci a mel, ca cirmemel a mi ddei gga cir ba ji. Capor ssormaer lei ba ji cexr, capor mel nael bil ji, ssormaer mel nael bber ji.

Ba ji teixl ho a nael, hoba cir beil har ssi, nael dder ajjix mal ji ddo a. Mal ji ho a nael dder niur ggaxr si lei a daemi bei ddo a. Nael hoba mi ddei mor pox xixl lei nia. Mor pox xixl lei ho a yoxl zeixleixr ar lal mor nia. Nr lal jjia mor teixl ho a nael dder jix ddo a. Nael jix a lei nr lal jix nia. Nr lal ddei jix ho a nael dder bei teixl a. Yel ssormaer mel nael mi dae ddo a; capor mel nael yaa leil lil zix gger.

Mi ddei dae teixl ho a dder yoxl me so zi ci a. Me so a nael, capor ssormaer lei so ssi, nael capor mel nael halae moxrzzo doxl, eine bei nia. Ssormaer mel nael veixr zzo ho, ake geso. Mael a nael halae hhexrnaexr. Miar jiur zi nael naexr nr mael; miar nr jiur zi lar arleixr naexr mael.

Miar nr jiur car, capor cirmelmel a nael niur loxl su lei zza; cirmelmel a nael, arcixl yixrhe a ha du lei a zzo bei. Ssormaer mel nael, eilneixr-nehe dder six bber ssi, cinal so ssi eine bei. Capor mel naelnae zzocir zzor ji ho a, zzeir ddei ggaxr dae a, wordabbor six jix ssi; nael ake hher su lei zza.

Cei ddaexr zi halleix nael, capor ssormaer lei cei caer ssi. Nael cei caer a nael ssormaer ardoxr caer miur; cei ddaexr a nael, capor ddaexr miur. Ssormaer mel nael cei bber; capor lei bil dax. Gexiu gga dder ddaexr jjia a.

Nael eilboxl daemi ddei ardoxr lexl hie ho a, yoxl so xiu nia a. Yel mi ddei gga cir ba ji. Capor mel nael niur ggaxr dae, sixggoxr lorleix bil dae a mi mor ssi. Ssormaer mel nael so sil nei naxcir bber dae a, cir beil gger ssi. Mi ddei mor pox xixl lei a jix bbae ho a, capor ddei yoxl so sil xiu, naxcir her, yoxl zeixleixr ar lal jix a nael dder ddo a; eine dder xiu teixl a.

Nael eilboxl ssormaer mel yoxl six bber, cinal so eil zzu bei. Capor mel lei six bil, zzeir zza mel nael zzeir ddei leil ggaxr dae a jix ssi. Zzeir nr zza mel nael bil lalnga. Capor mel lei cinal so su zza, nael nganiul. Zzeir zza mel nael, zzeir ddei leil ggaxr dae a jix ssi su lei zza, nael ake bei su lei armel zza. Ake hher su mel nael, dirsir i nei ake guaxr.

Eilboxl veixr seixl du a nael, ca qie nia. Veixr seixl a nael capor lar seixl; ssormaer mel nael cinal so gger ssi. Capor armel a nael

zzeir ggaxr dae a, yaa dax jix mae ssi. Ssormaer mel nael yaa leil so gger. Capor mel nael zzeir jix neixl, nael yaa mel mercixl neixmar a saelnei jjixr ci ddo. Jjixr ci a nael, capor mel halae zzeir jix pe niaseir; jix pe ho a saelnei zzo zzor. Capor veixr seixl su mel nael halae veixr oldde cu nia.

Veixr seixl jjia ho a mel, xi li bei box su lei yarzi miur. Capor mel yoxl si leil beijjiu ssi, ssormaer mel lei beijjiu ssi su zza, nael nganiul. Si leil beijjiu ssi a nael, ssormaer mel nael, nilzei bber; capor mel nael, nilzei cix su mel nael nilzei cix; nixlnaexl ggiex su mel nael, nixlnaexl ggiex. Lu ddei cix teixl ho a nael, yoxl ngier hhe nia. Nael ssormaer mel nael, yoxl ngier deix ngier bber; capor mel nael, ngier hhe var mel nael ngier hhe; nixlnaexl ggiex su lei zza; sihui ggiex su lei zza. Nael eilboxl cirhhexr-hanga lei bei teixl ho a nael dder Guxlsixl ci ddo jiur a.

Nael Guxlsixl bbeixanar, ngua capor mel yoxl sulku nia a. Gaxggor carbeix cirhhexr-hanga dax zzor ssi nia, dda ssi nia. Nael ssormaer mel nael ake bbae dae lalssa, dirsir igax dae lalssa.

Guxlsixl goxr teixl ho a nael dder yoxl lil xiu nia a; nael lilvu gga ajjix mal ji a lilvu bei nia. Capor mel nael yoxl lil gger gua bbae nia. Nael yoxl cei sil xiu deix, naxcir her deix, boxrmoxr bbe deix a nael dder ddo a.

Lil mel ner du lei a nael, zzizzi zzizzi a nael, so hal zzu se jjia a;
nael dder yoxl ajjix mal a, daemi bei ddo a. Yel yoxl mi dae du a.
Eine mel dder cir koxl za xixl ci a.



19. Xi Zi A Arsae Zi Biar

Ngua mermi su mel, xi zi a mel, zzi gga zi le-nr-sel. Hormo zir nei hormo zir nr zi. Halcar lei cir hhexr ar zzir zi, nael halcar mel, veimar be, zzaexpor be, yel zzi dax zi naer, cir zzaex gga lei li ngor hhexr hher dae. Nael eilcar mel, armael ddei armael ar zzir zi lalnga a; zzicarzzi dax zi nr naer a; armael ddei armael ar zzaex goxr lalnga a.

Nael eine zi a mel, sseigu nei legelbbe sser miur nia. Halae dixlji nr zza su mel hoba kebal ca dax dixlji ar ddei vae bbeixsael bo har nia. Bo wo ho a saelnei middur guaxr su vaervaerpor ddei dax dixlji pi ssi cexr. Halcar doxl, dixlji bo a lei yarzi bo so, nael eilcar mel, yarzi bo sol.

Dixlji ddei zza ho a nael, bbesur zza halmel nael dder zi du xie a. Nael bbesur nr zza halmel mel, xiddur, sixlox, legelbbe halmel lei cir, nr, so koxl baxl zaxr nia. Cirkoxlkoxl a mel dixlji pi a lei yarzi pi sol, nael ha pi wo ho a nael dder zi ddo a; yel dixlji giexl zaxr cexr. Legelbbe zza arddeirnga a nael, cixlni nr zi

zzorbbeixlei, sixrjiuxr xiax har dae, halae xiaxlbaxlzua ddaexr har dae lol.

Halcar nael, legelbbe lei armael ddei armael giexl doxr nia, nael eilcar mel legelbbe lei giexl vur su zza, yel si dax vae a lei cexr. Halae ca qie a, dixlji giexl, eine bei doxr nia. Giexl har dae a nael dder ca nei caezi qie a, legelbbe mel ba xixl lei a, sixrjiuxr xiax ddo a.

Sixrjiuxr xiax har ho a nael, xiaxlbaxlzua lu ddaexr ddo a. Lu ddaexr teixl ho a nael dder xi taexl ddo a. Xi taexl teixl ho a nael dder xi xiuxl ddo a. Xi zzir xiuxl du lei ho a mel dder yoxl xiddur diexr ngexl nei ngier hhe deix ddo a. Ngier hhe teixl ho a nael, jiasibbor arleixr zuaxiu a dder ddo a.

Zuaxiu a nael, bbolixr, cixr, cixrzua nei dirbaxlzua eilmel vae har nia, halae mojiuxr nrnelsael qie a bei gger lol nia. Nael mojiuxr mel leil lei worper gger nia. Zuaxiu teixl ho a nael xi zzir dder zi teixl ho a.



20. Neir Zi Neir Ho

Azo lerler neir zi neir ho halmel mel Loxrlapor mel zoxl a bei. Loxrlapor mel dax cirza-hanga neir lei zza: mer neir, mi neir, lur neir. Loxrlapor mel neir zi a mel halleix tortor dder zi si lei. Neir mel mel ca leil xix leilei, yel ca mel dder yar leil hexzzi doxl cirza-hanga zi.

Halae ake neir lei armel zza, hherdder ca si ho mel ddei xiu mel nga a. Halmel leil mel ake hhexr ddei porpor lei bbeix. Jiax goxr nei azo lerler ar ddei bei a lei neir mel leil zi doxr nia, eine nr ddo a zzae hane zi doxr nia. Cirza-hanga neir mel leil zi a mel, hexzzi doxl, azo lerler zzorddu nei ddaddu zi, olddetexl, ca si ho halmel leil zzirbae cu gger. Cirdaedae a nael yix seixl zi eine bei, cirdaedae a neir zi a, mae ni lei sser.

Si bbeix ggie bbejjiur a bbeix, halcar, neirsaerpor ddei mel neir bei a ddoddomo halmel bei var. Eilleix nael neir i doxr dae seir bbeixanar, neir bei a ddoddomo bei nr var a. Azo lerler neir ho

zi a lei dder ake ca seirpor hherdder capor ddei bei lalinga. Nael si leil neir xix a, no su halmel nga a mel dder yoxl neirsaerpor te leil gie si lei a bei gger lei lol.



Cirdaadae a nael ca mel neir leil zi ggie halmaex dol dae zzaegu mel dol nr ma a, yaa leil yoxl bermixl yax leilei, yel meixddur ddei gier lei gier wor nr ddo zza var. Eine nga a mel dder zzaegu hal ddei arleixr zar box nia.

Xi zi a lei dixl sixr i ssi nia, mi ddei halmaex xi zi ddoddo i, halae xi ddei nei gielmi ddei arddol piar gga mal nia i.

Halae ca cirmelmel a si leil suar a, caqiassor ar ddei bei. Caqia eil ddei leil hhexr cex a, yaa leil vuxryixr su ca mel leil suar a, yaa leil no lol. Nael Loxrlapor mel lei zzi dax bei le-nr-sel, yel eilleix ci a mel eine bei su hormo sael nr zza a.

Nael eilleix ca mel mel ca si ho mel leil lar bei gger nr nga a nei, gol dae seir halmel leil lei neir bei gger su zza. Ca mel si ho a lei xiu ddei halae zza dae seir, eine xiar dae. Nael ca si ho a hher

ggie seirseir ar maex nei nr seir ar maex zza. Nael nr si seir mel, arseir lei arddolmaex ssi nr saexl. Birdae a bbeix, ca si arddeirnga a, yaa kax gga nixixl i su ddei dder yaa leil arddol cir ni ca sima ddei leil giexlhex nia i gger. Ca mel zzirdae a ca sima ddei giexlhex hal cir ni almer lei arddeirnga a, yar dder goxr seir ggie halmaex ssi a, hherdder merhhexr gga ddeix. Nael ca sima ddei leil giexlhex hal cir ni almer nr lei arddeirnga a, yar dder goxr nr seir ggie halmaex ssi a, hherdder dilxyuxl gga ze i a.



Kax gga yarzi zoxlyoxl neir hal ddei mel dder seirpormar ddei nga a; kax cir ddei gga seirpormar cir ddei a zza. Halcar mel seirpor xi zza, nael eilcar mel sixzzei ar zzei bbeixsael legelbbe lar cir taex nga a, halae sasexr lei ar zzei zza. Sasexr zzei eil zzei mel zoxlzoxl a mel sixzzei yarmargu ar zzei a. Cirdaedae a nael yoxl yarleixl lei zza. Jiax goxr nei azo lerler bei a mel dder seirpormar nei sasexr leil lei zi ssi nia. Halmaex gga mel

seixbeixbeix arla ar maex a. Yel ha arseir sasexr zzei dax naer ggie sirbeixl bbeixsael siruxl, eine bei arddeirnga a, yaa dder hexzzi doxl lei, olddetexl lei nia. Nrnga a sasexr ddei yar leil xix leilei. Ha arseir sixzzei eil zzei leil taexl dae bbeixsael arsaer lerler bei dae ggur zzorbbeix lei, yaa nr seir pex dae var, yel dder hexzzi doxl ssi nia. Sixzzei eil zzei mel cirdaedae a yoxl saer zzei lei nga var. Saer zzei nga arddeirnga a, ca mel saer caex lel ssi zzorbbeixlei caex lel ssi ddo, nael caex lel ssi xilmeir leil mel olddetexl nia.

Birdae a bbeix, arddol hhexr zzeir zeil dae a, mur ssor cer bbeixsael niur ssor cer arddeirnga a mel, ca seirpor hhexr dder sixzzei eil zzei dax ssi a, seirpor zi gger ssi. Yel sixzzei eil zzei leil mae ni ar co gaxl deix gger, hexzzi doxl, yix seixl zi, zziseixl-lorseixl ardoxr her, eine bei a yar leil zi. Yilsi mel dder seirpormar ddei leil qie a yaa leil zabbar guaxr gger dae lol. Zi ho a mel dder yix hor ddei nael ake vei xil lei a zzor jjixr ddo a. Yel moxrxil nilni ar zex sser a, mur ssor leibbei ddei leil gaxl gex gger dae, yel moxrxil zex leil nael seilzol niulddurddur ar bo diux gex gger dae, nael moxrxil hal zex mel nilni nga nia. Anix ssor mel leil lei xiu teixl lei a, cir xiubbo nga ho a lei seirpor zi gger ssi nia, halae mi ae gger nia.



Ca mel armael ddei porpor hhexr leil zi a lei yarzi zoxlyoxl. Porpor hhexr leil mel ake lebbor lu ddei agala gga malmal dol dae. Cirmelmel a valili bei, cirmelmel a nael yoxl sixlfamo bei. Yel si ho a porpor mel leil nalmaex kiexl deix dae. Halae nilhar bex so taex dol deix dae. Eil so taex leil hexzzi doxl deix dae, halae baxlaxr mel gga lei azo lerler zzorddu ji dae a yaa leil zi, yoxl ca ar zzu huax deix dae. Eil zzu mel dder si ho ca halmel nga a. Nael ca mel ake hhexr leil hexzzi doxl nei azo lerler zi eine bei a mel, porpor hhexr xilmeir oldde so be textl nia. Zi ggie hormoler nei zza arddeirnga a, cir maex oldde so be textl nia. Si ho ca halmel ddei mi ddei mel sul ar zul leil vaexr deix dae a, six ar caex leil niaxl gex dae, yel porpor hhexr ggaxrsibbor piar gga cex gex dae.



Halae kebal neir lei cirke zza. Alddur su gger su neir lei armel zza. Ciryoxr a nga, guxlsixl goxr a mel merlabbor meixr mel ddei vaervaerpor ddei leil alddur ddei leil niaxl gex gger dae a, alddur su gger dae lol. Jiax goxr nei azo lerler bei a mel ggucirmi hexzzi doxl nia, yel alddur su gger su neir mel leil zi.



Halae yoxl zzeir bbe alddur leil su gger su neir lei zza. Alddur ddei leil bbie ar taex gaxl gex dae a, bbie taex gga nael cirzahaंगा mae xil neixl gex dae six ar caex cex gex dae, zzeir bbe alddur peixl leil lei hexzzi doxl nia.



Keba neir lei ar yoxr zza, hherdder loxzoxl ddei neir, nael Loxrlapor mel zoxlloxryixr eine bbeix. Zoxlloxryixr ddei yoxryaxl ddei mel loxzoxl ddei dax lu ddei leil niaxl gex dae. Neir eil ddei

mel ca leil ggecir zzaso lol, halae ca leil nei zzeir leil zzor labox qiuxr gger su ddei nga a.



Halae wordabbor lei neir hormo zza. Cir maex ddei neir mel lei cir maex dax le-nr-sel. Ca mel i har dae sixzzei hal zzei dax legelbbe ar taex dol dae a mel dder halmaex nrbba bei nr ddo ar maex a si leil saexl lol. Hherdder kax gga sasexr zzei dax sael a nga. Eilmaex gga mel nrbba-nrbba bei nr ddo, sirbeixl siruxl eine bei nr ddo. Birdae a bbeix, ca eine ar ddei a wordabbor no xixl lei, bbeixsael worda-worbbor zzeir loxl dae a, zzeir mel arsae lerler nga zzorbbeixlei, sasexr zzei leil hexzzi doxl ssi nia.

Yoxl lur neir lei armel zza. Lur neir mel mel ajjix guaxr. Lur neir mel nael dder lurddur ddei dax legelbbe ar taex zza a, hal taex leil lur ar ddei kiexl gex dae. Ca mel zzirdae a, yaa ajjix dda dae

mel mel lur meir ddei gga pe teixl lei arddeir a, yel yaa lur neir ddei leil lei hexzzi doxl.

Mi dae zi ci a lei, leiddur armel zza. Lil xiu ssi xilmeir leil mel ca mel mel yixfu gel ddei lilvu giexrluxl gga giexl kerzi a, hal ddei leil hexzzi doxl, neir zi eine bei.

Jiax goxr a mel jiax lar goxr nr nga a nei, cirza-hanga neir leil lei zi nia, halae leiddur mel dax lei bei mae dae nia.



21. Halcar, Cirmu Fu

Halcar, cirmu fu a doxl hherdder bbeix, eilsenehe zzocir zzorbbexr a nael, yar leil fu teixl du a. Yar pia sixl veixr du lei, maelmaer veixr du lei a nael, jiataxr wormeir lo olddetexl si lei.

Texl si lei a nael, yargo yar leil bber zei xixl lei. Bber zei xixl lei a nael, jiasibbor gieyi leil bber ci a nael almeixr so meir hiex zol. Yel almeixr hal so meir mel hherdder yaa hhexr leil loxlseimoxrsei ixl dol gger a. Yar na-nr-ge arleixr ggor lalnga.

Yel gieyi leil so za bber ho a mel dder zzaexggu gga bber zei ci a mel, sargaxl nael hherdder cirmusixl bber su ddei yar leil bber teixl a. Bber teixl a nael dder yaa leil zalbbaer laxrmexrjiuxr laxr dae laxr dae a nael bber teixl a. Yar halae nge dae. Yar yarbbor yarma leil piur nr ddo a nge dae eine arddeir a naer ngo. Eine nge dae a nael, eine bber teixl nael dder eine ssi a sor.

Baxlluxl bber ci a nael, vize ar doxl gger a nael, yoxl ddaerlaer cirmusixl ddei zei lei, nael yargo yaa leil arleixr bber lael teixl a

mel dder cirmusixl bber su ddei yillir bbeix su hhexr dax bber mal ci nia.

Bbeix su hhexr dax bber ci a nael dder, ceirxi giex gga bber dil, hherdder ceirxi giex gga ceirneir so za ggaxr ho a nael dder, yar leil nalbbor zexlfaxr gomo bbor bber deix a. Nalbbor bber deix a nael dder sixlfa zaerzir teixl bbor lo, ssaex kar dae nalmaex gga bber deix a nael dder ci pe ssi a. Argaxl ci ddei pe teixl ho a nael yar yoxl nalbbor jiataxr dax oldde ar za texl si lei a mel dder bber zei xixl a mel zalbbor ceirxidal gga bber zei xixl ho a.

Niul seivi mu su, azo bei su lei cirmusixl ddei leil mia nr ddo, yar leil merni nr mia lol a mel maelmaer qiu gex dae. Yel dder ceirxidal gga bber zei xixl a. Halbbaer yarbbor yarma hhexr dax mel almeixr halbbaer ji si lei; baxlaxr, azzu lei halbbaer vei si lei. Yar mel eilni mel yar leil bbeix su hhexr dax zzo nr ddo. Eilmei ggo zex teixl lei a sael yar leil mia ddo. Argge-nehe seirpor xi gga olddetexl ssi a sael yar leil mia ddo.

Doxl dder eine a nga sor.